

四庫全書

集部

欽定四庫全書

集部

弇州續稿卷二十三

四

詳校官編修_臣潘庭筠

中書_臣劉源溥覆勘

總校官進士_臣楊懋珩

校對官庶吉士_臣何思鈞

謄錄監生_臣張元信

欽定四庫全書

弇州續稿卷二十三

明 王世貞 撰

詩部

七言絕句

七年前為在明賦此十絕句今春在明遇余吳閭
復出卷索書之時余二人各挂冠久矣因題二
七言絕於後

當年楚館咏江籬忽戴宮花集鳳池何限幽芳領秋意
于今方是屬君時

其二

才談訪舊便欣然更怯長江浪拍天十絕新題挂君壁
似應翻勝子猷船

沈嘉則屠長卿相約為古樂府雜題二十絕句索
和余以言激之謂長卿之高華嘉則之雄渾信
是當家若情事或須讓老夫一步兩日內便能

成此二君得無笑其語之不讐也

湘妃竹

幾點苔痕上翠筠千秋長見淚痕新從他帝子誇江渚
不是蒼梧望裏人

吳王試劍石

燿爾青天一電流山頭白虎迥驚愁不辭頑質長剝剝
相國功多也屬鏤

秦女捲衣

秦女吳妝玉不如捲衣猶在五更初休疑雨露無多點
關內離宮二百餘

高帝斬蛇劍

大澤雲腥碧血侵芙蓉猶在匣中吟天教武庫穿雲去

負盡殘年斬馬心

穿雲事見西京雜記漢有斬馬劍謂司馬氏也

賈佩蘭出為段儒妻

愁向人間說漢宮春歌字字咽春風空憐透指金羈美
不及秦家照膽銅

探丸

月黑牀頭風雨鳴五陵西去漏三更賊曹休怪探丸事
自是人間有不平

藏鉤

花前彊戲巧爭新無奈此娘道便真總為怯輸渾不展

依然鉤弋趙夫人

其戲起自微趙夫人也

蹴鞠

油場光軟似凝脂結社分弮各露奇子政自誇新樣好

宮中原不受彈碁

劉子政以蹴鞠勞神為彈碁之戲進帝得青羔裘紫絲履之賜

鞦韆

柔荑弱柳競風流蕩漾顛狂不自由却似儂家新孔雀

學飛橫上樹梢頭

春日獨當壚

纖玉徐量琥珀卮杏紅衫子任風吹公然解贈金條脫

賴是傍無犢鼻兒

謂相如也

七寶避風臺

七寶粧成百尺臺
怯風間闔不曾開
縱令吹著雙飛去
還解雙含禍水來

薛夜來

空勞國色更針神
雨露恩移別院新
記取蒲生塘上曲
九畹差勝姓甄人

清夜游西園

夜涼清吹夾車來
箇箇秋蘭水陸開
何限風光何限月
有誰能嗣建安才

愛妾換馬

燕領風雲切大荒
雕鞍新熱冷紅粧
擢奇到底應須盡
其奈蛾眉也是霜

採蓮曲

玉腕交加摘露房
生憎孟姥妬檀郎
榜來蘭櫂吹令遠
引去蓮歌咽不揚

若耶溪

步屣尋春傍若耶
雙環白足洗輕紗
興來莫蹈雲門寺

處處青帘賣酒家

北風吹裙帶

嫋嫋婷婷驕上春，狂風搖蕩不由身。君王莫問吹多少，

可是吳郎畫裏人。

明皇問太真任吹多少，吳帶當風謂道子畫也。

宮蠶

摘來桑葉餵蠶肥，繅得流黃夜上機。愁說上方初進御，
君王別選越羅衣。

燕姬墮馬

墮馬胡姬不動塵飛鞍一躍轉如神莫輕來自侯門過
惹得梁家髻樣新

春閨怨

何曾鵲印在龍荒止許雙蛾鎖洞房秋夜縱長猶有夢
無情無思對斜陽

送李德宣之蕭山司訓二絕

蕭山竹箭美於玉湘湖蓴菜綠勝絲任是廣文官舍冷
未應翻作季鷹思

其二

八月晴江響怒雷西陵渡口趁潮開船頭赤鯉如人立
知是龍湫帶雨來

徐大光祿奉使江西淮卽見顧贈之再得四絕句
擁傳初從尚食歸天香細細染宮衣欲知明主興居事
可謂韓休疏不肥

其二

淮王上客總能文誰似風流徐少君彩筆寫將芝嶺色

錦囊收盡蠡湖雲

其三

豫章何限豫章材蔽日千雲夾道開
君去試看梁棟具
阿誰非是相公裁

其四

高秋伏枕罷絃時一曲聊將贈子期
若向洪都朱邸聽
有人能譜右丞詩

偶題

一縷沈烟裊碧虛五千言是讀殘書亦知終日無凡事
祇恐凡情未破除

贈孫章甫

午壇烟煖日遲遲玉洞羣真禮法師最是黃庭須早熟
莫教符力不相隨

其二

游戲人間事事工何人不愛葛仙翁那堪一片桃花水
鎖住蓬萊未許通

初入道史氏婦病死詩以傷之

石湖橋畔土千堆送客魂消黯自回唯有師真曾授記
寸心猶暖未成灰

其二

初將七魄試重泉同學羣姑盡惘然不信已生忉利界
散花先到世尊前

過新第

壓簾銀蒜玉鈎斜數縷沈烟裊絳紗曾向此中投一宿

不知端的是誰家

過弇園

平泉花木四時春
拋作朱崖萬里身
爭似弇園三五步
盡將春色付游人

仲冬望乍晴風橫甚而窻月破夢有成

霽月踈窻分外明
狂風無奈海潮聲
誰能忍冷孤峰宿
坐看沈波洗太清

極寒撥鑪中灰得小火遂成

楸枰灰殘冷更新撥深微火似魚鱗雖然撥得無些子
少選能為滿屋春

穆考功敬甫早歲乞休惟以讀書苦吟為事今年
擬少陵秋興八首使其子光胤習右軍書書之
見寄走筆為謝得四絕句

遲鴻臺畔擅三餘良冶為箕也不踈欲識自相師友意
少陵秋興右軍書

其二

誰道扶風近帝都
繞臺千匝盡江湖
南荒豈少同游侶
踏徧春風聞鷓鴣

其三

縱橫彩筆寫雲霞
其奈山人行徑賒
綺語識來無一事
偶然微雪警窓紗

其四

羊家小婢學夫人
到底悲歡不屬身
爭似姪娥粧洗盡
自然冰玉離風塵

正月六日送舍弟河口即事偶成

青絲忽散木蘭舟
疊鼓揚舲可自由
欲試離心無處覓
一灣新月乍當頭

其二

三千里外是西秦
五步東頭故里閨
誰信一杯分手後
便為函谷聽雞人

其三

過船仍戴紫陽巾
鼓吹旌旗鬧殺人
了得去留無碍意

不論居士宰官身

其四

道人巾裹比丘衣
炊黍烹葵儘解肥
無石可留初起牧
有乘專待世親歸

其五

經年不踏水西門
也似城居也似村
拂面東風猶未識
偶然微綠現籬根

其六

翻因愛弟有離筵羣從兒孫滿目前總是現來阿閼國
一燈還傍佛龕懸

夢後席上口占

偶然夢作朝官好醒後依然一道人却憶景陽鐘底夢
五湖佳處便垂綸

其二

春來大作縱橫夢夢裏頭頭記却無猶勝日長無外事
時從故紙問葫蘆

送里人金大從軍兼簡方記室景武

雙溝結束氣如雲
亞子城西酒半醺
欲向故人歌出塞
近來王粲倦從軍

其二

薊門芳草殢雕鞍
下馬胡姬酒未闌
金印不關明主惜
春來質子徧長安

送曹子念文學游閩還訪天台

曇陽觀頭夜香焚
裊作輪囷三素雲
若到幔亭應少住

為余持贈武夷君

其二

武夷九曲青不足還向天台訪石梁為是索輕難歷載
盡收山色付奚囊

其三

冰盤不肯薦楊梅五月閩天錦作堆日啖紅香三百顆
可應單為荔枝來

其四

虬髯鐵面太崢嶸
省爾菰蘆意氣生
莫為外家誇宅相
近來文苑已除名

郊行

滿村浮綠數枝紅
也解愁儂也殢儂
欲覓二端無處著
翛然自在版輿中

折簡要家馭提學同長公學士看地棠花

弇園千樹錦橫斜
雨妬風欺一任他
唯愛君家兄弟好
就中留得地棠花

小病慙花期唯牡丹在耳次公將有豫州之行更
成一絕句

飄盡棠梨見牡丹折花行酒莫留殘洛陽春事知尤少
無那明年兩地看

元馭學士於新觀種花挑野菜前後戲呈得十二
首

白白紅紅幾樹斜清溪一曲水如霞不須牙版標名字
看著應呼學士花

其二

一莖鬚頭一佛圓供時長在梵王前遠公未曉西歸意

親鑿方池種白蓮

元馭手種白蓮

其三

仲冬朔日僊蛻迴叢桂凌霜特地開莫笑淨名居士病

前身金粟老如來

元馭時有微疾故云

其四

墻陰馬鬣禿於童眼看桃花樹樹紅春色縱歸猶未辨

與君相對試霜風

其五

舞蝶雙縈小玉團
殿他春事耐他殘
道人香色元無住
偶爾聞呼綠牡丹

其六

三月行盡春光微
欲覓飛花無可飛
高下川原諸草樹
也能將綠染人衣

其七

野菜經春百味新
長鏡一柄便周身
首陽薇蕨元何限
始解夷齊未盡貧

其八

一叢新竹迸龍鱗
微雨仍驚玉菌新
乞得維摩香積飯
午齋先供兩閒人

其九

五月五日坐東籬
忽有黃花抽數枝
呼杯恐失醒纍意
不飲生教醉令嗤

其十

曇陽庵東積水多僧來商畧種新荷雞頭菱角亦堪可
奈此一碧玻璃何

其十一

六月十八陽侯狂老樹草偃蛙窺牀老夫擁被卧三夕
竟有紅日翔扶桑

其十二

灩灩湛湛露栢間垂色勝醞醐味勝飴見說華池元自有

可煩天上借瑤枝

為僧題雲林卷

曉樹蒼蒼徑未分
數聲清梵隔林聞
莫欺壚底旃檀
爐也解蒸為寶燄雲

為章仲玉題保竹卷

龍鐘數挺不辭殘
把送奚囊耐歲寒
絕勝洛陽西邸內
勞人日日報平安

題畫

古樹精籃杳靄間，輕帆吹過碧灣環。
道人雙屐何曾繫，猶自貪看畫裏山。

喻蘭溪邦相為四絕句貽我頗致青蠅之感，且以名酒二甌見餉，其落句云：「萬事從教醉裏銷。」次第和答。

勞君五嶽起雙眉，老病無能學羸提。
祇是憐他善星輩，惡風吹送下泥犂。

其二

金華洞洞有仙官叱石為羊也不難總為漢家羅網急
雙鳬莫遣問長安

其三

潘郎可是懶栽花一賦能當萬樹霞却笑爾時勾漏
令不從身內覓丹砂

其四

蘭溪新酒碧於泉一斗真堪價十千我醉聲聞渾不要
使君公暇好逃禪

送潘大憲副視關中學政

雍容冠飾入燕京經術江東舊著名不似公家潘散騎
僅將行色賦西征

其二

三輔青衿拜下風就中三禮更推公似聞伯仲金華省
曾奏先朝白虎通

偶閱楞嚴作

十年難弟未知音七處徵心可見心何似捲堂聊散去

任他魚鳥各飛沉

其二

蓮花採去覓淤泥
覷面張拳轉更迷
了得本來無染意
眼前何境不菩提

其三

毋勞九品憶蓮臺
也莫悽悽代世哀
一念不生真體淨
圓通大士應聲來

其四

莫把塵心惹世塵
阿私十格尚沉淪
那知梵釋諸天位
原是靈山九地人

壽魏鴻臚七袞

詩酒絃歌寄此生
風流重見顧家瑛

君居為阿瑛遺址

不須屈

指量貧富七十年
中擅太平

其二

庭前木蘭何太奇
千朵萬朵白迷離
爭似中堂雙玉

樹對翻華萼吐孫枝

君庭玉蘭之盛甲吳中

其三

牙緋艾綠擁朋尊可愛君家好弟昆猶有雍容詩禮

在令人長憶魏陽元

君之伯父也

其四

賓筵弁側半傀俄猶戴烏紗檢白波不為一官能戀戀
少年辛苦讀書多

周三雋郎時誦道書辭其舅學士公游南太學

得絕句二首

十里珠簾出曉妝長干春色待周郎從他誤曲毋勞顧
留得齋心奉紫皇

其二

袖裏南華與舅論翻從玉潤愛冰神晚菰早韭山中味
慎莫誇他肉食人

戲為櫻桃題二絕句

葡萄賜紫那同貴金橘堆黃剗是酸何似琢圓千粒
鞞深紅透出水晶盤

其二

含桃一薦栢梁新
偷入新詩郭舍人
笑殺上林村令句
李梅爭似嚙妃脣

送張蘭谿公除補選

迢迢單舫上天京
單父當年政已成
五月南薰無限意
彈琴莫道不成聲

其二

曾傳八詠在東陽
可借雙鳬下未央
溪邊小兒騎竹馬

洞口僊人呼石羊

襄國王飛教千里歲一慰存野人無以仰酬惟祝
麟趾之慶而已敬成四絕情見乎辭

老龍隄畔彩雲開千乘旌旗射獵來蔽日鵬雛渾不管
掌中貪捧一珠迴

其二

渚宮春雪一登壇宋玉文成最耐看十二巫峯盡磐石
莫容雲雨夢中殘

其三

六月金盤安石榴榴房忽綻玉漿流欲知太母嘗新意
親遣高王問魏收

其四

老病蒙莊五畝陰年年孤負楚王金雖然曳尾泥塗樂
未少銜珠一片心

陳道復寫牡丹徵仲題句以徐熙擬之戲步於後
誰將野逸擬徐熙一種妖紅暈玉肌應是陳閔被宣召

沈香亭畔寫楊妃

答沈嘉則

風流翻入步虛詞
南國人稱沈亞之
不信緱山辛苦意
只言笙鶴便相隨

其二

才從苦海脫沈淪
兩鬢蕭疎已似銀
君是謫仙寧不解
玉京那有半殘人

同州王先生賜紱依雲陽菴脩西方業以俟師

真貯蠻少子某迎之不可於其歸也代先生
送之

阿翁非為遠公留為覓金篋淨土游十萬八千猶未是
可應西向憶同州

其二

莫因離別淚闌干老子冰心徹底寒會得西歸真意後
不妨兒女話團圓

同州二先輩以書迎其父令公歸不得作二絕慰

之

雪山行道不辭辛車匿空歸羅睺嗔以此深心奉塵刹
古來方是報恩人

其二

朝聞丹訣暮西還不踏江南處處山但使郎君如尹
喜可容真氣誤函關

題楓谷卷為杭州喻邦相

春至能青秋更丹山深不共荻花寒武林官道知多少

總與行人醉面看

香山有楓葉荻
花秋瑟瑟之句

其二

庭葵嚮陽知故赤
谷楓背日亦成丹
總令心事各有寄

誰解霜風領歲寒

少陵有背日丹
楓萬木凋之句

贈錢效拙六表壽言二絕句

錢翁長余星一週
十年先著鹿皮裘
如逢海上添籌客

為我聊呼第二籌

君居海上而好
著隱士巾服

其二

魯連乍覓東海住安期復從海東來飲君壽酒君試

問為是僊才說客才

君有縱橫才而二仙
皆嘗作說客故云

贈黃鵠

道子麓豪故有神精微仍數李公麟何當掃盡鉛華態
貌得乾坤萬古真

其二

誓墓歸來老病身無心去逐世間塵與君轟飲君猶恨
不寫人間第一人

寄贈吳大僊倩

十載吳郎已大名
青山依舊楚諸生
似聞老蚌蹉跎意
欲遣雙珠入帝城

寄贈吳二臯倩

酒態傀俄兄不如
弄船釣得武昌魚
青藜忽破高齋色
醒後吾伊讀父書

和張肖甫司馬題王陽德使君陽湖別墅十詠

知樂軒

鯨口初分玉澗餘金鱗點點躍青渠欲知魚樂無如子

曾向澄江夢作魚

君嘗令靖江故以令事戲之

清涼界

從他赤日也清涼室利南來是道場不似石家金谷地

熱心偏向綠珠忙

五臺有清涼界金谷亦有清涼臺

紆青閣

小閣踈簾面面開不知何處送青來佛螺欲傍斜陽斂

那有珠絲繫得迴

紅雨蹊

天花爭墜不黏身
下作東林紅錦裯
却恨酒醒眠起後
悄然無計一留春

浮碧臺

千尋碧皺倚空濛
湖眼山眉態不窮
錯訝樓臺緣蜃氣
中天湧出化人宮

金粟嶺

紛紛金粟萬如來
移自西方七寶臺
笑殺中秋靈隱夜

總令收得不堪哉

穿雲峽

有時峽坼流雲逗
有時雲薄峯尖透
主人躡屐偃僂歸
剪得氤縕滿雙袖

超然臺

暘湖千頃白雲流
百尺隄俄在上頭
欲語超然無可道
不牽塵世一絲愁

筠阿館

萬條青玉逼雲寒餘穉猶堪剪作冠張廌莫跨居處好
王家亦自有琅玕

暑香亭

才歌白苧水生涼脉脉柔風送暗香記取鄭公三伏日
碧筒徐吸紫霞漿

偶題

拋却功名事上真名根猶自惹凡塵怪來人爲宮中客
多是羲皇向上人

其二

平生不擬作裴休見有遺書好撥愁撥得一行黃蘗字
何須更訪赤松游

蔡文學曼倩求書其贈大父九十四翁及父孝廉
詩因題一絕於後

九十四翁歸道鄉孝廉花萼日相望

時館於
吾弟所

看君三世

催身老不是誇君大父行

弇州續稿卷二十三

欽定四庫全書

弇州續稿卷二十四

明 王世貞 撰

詩部

七言絕句

昨秋有傳殿卿左史游道山者得一絕見慰不勝
快心走筆奉賀

春來飛夢玉京山
乞得交梨一顆還
徧叩金臺無長史

祇應猶自在人間

有蓮洲比丘者托康生寄一偈云法身有口能噉
飯大地無塵翳眼睛此事遙知已相悉願垂一

語印愚情率爾奉答

噉飯莫貪香積飯無塵翻惹六根塵通身是口通身眼
口眼應須賺世人

又代僧答

噉飯何妨香積飯無塵一任世間塵通身是口通身眼

口眼何曾賺世人

書付印公轉寄不知到否三月偶舉似驕兒拈
曰已是印了也又曰以後再莫舉似別人問余
二詩若何曰後一偈此僧尚留目在前一偈瞎
却此僧在已而曰雖然如此是教典中話余出
兩步霍然云法身有口能噉飯有口不噉飯要
口怎麼大地無塵翳眼睛誰翳汝然已無用矣
題李使君扇頭小畫

幾重雲樹幾重山小小茅簷三兩間但許使君齋酒至
不妨南陌荷鋤還

袁繩之太常起家赴南少司空走筆為贈

漢家清議重南宮卧雪能憐袁邵公總為太常高第久
璽書連日拜司空

其二

單車軋軋度丹陽十載清名揚太常任是令公家宴好
也應中夜減紅妝

其三

顛倒衣裳白髮侵篋中腰帶半無金當時諫草垂磨滅
猶是區區請劍心

其四

依然藍筍叩精蘭剝啄聲停稚子歡懶病科頭當六月
不因知己便彈冠

吳生得神符治余少子士駿瘧應手即愈走筆贈
之

眼見兒曹病骨蘇將言無鬼未全無少陵總有花卿句
不及吳郎一字符

偶成

楚英晚節希轉輪漢獄株連千萬人清淨慈悲兩安在
西來誰為治貪嗔

其二

讀書萬卷葛勾漏飲酒千鍾郭景純狂夫借此聊自暖
第恐天宮無二人

其三

疇尊武媚作越古疇字阿廢為總持不怕舌尖難過鼻
只謀衣鉢且寬眉

其四

古來持律讓宣公何事貪它天食供身後擬歸慈氏院
眼前不見西來宗

其五

于闐比漢一小縣縱令護法能幾何懊恨談禪裴相國

不將黃蘗換青娥

其六

海山方丈不肯住要住第三兜率天只恐放教居外院
小蠻樊素共年年

其七

白雲先生高侍中自誇呼吸與天通斗大揚州貢賦絕
祇緣真誥有曹公

其八

西崑艷體揚學士醉裏禪那誇更深金面棋盤都拍碎
却因丁寇便驚心

其九

蓮經女子轉山谷五戒禪師作東坡一升一降事未已
更四百年將奈何

其十

少年謗法晚護法關評魯公少溫公僧雛兩耳掩欲盡
未必西天耳盡聾

其十一

縱橫說法張無垢
猶自低頭妙喜公
讀盡傳燈杲師業
覺他心地未全空

其十二

長春占斷維摩刹
靈噩平增德士巾
歸覩玉皇稱帝釋
始知元是一家人

樓道人一衲一笠一瓢
遨遊海嶽而所携詩卷多
名士如王格太僕吳國倫
參政張位侍讀同王

稱登太學張鳳翼先輩昆弟之作皆在焉仍虛
首簡以乞余題戲呈二絕歸之

道人雅自毛仙伯元白韓劉詩卷多解道蕊珠宮裏住
盡應翻作步虛歌

其二

囊裏牛腰詩卷麁他年鶴背重還無何如負局先生好
只挾真形五嶽圖

百穀別余禮補陀出此扇索題走筆戲之

南海南頭有落迦觀音寶座擁雲霞王郎內典應須看
此是支那小白花

伯玉肖甫見過後即作書遣候明卿而殊苦一介
之難因成二絕并寄明卿

門外初停嵇呂車殷勤仍囑武昌魚從來一點相知念
不為蒲輪便破除

其二

丹楓九月大江寒欲結雙魚千萬難何似只憑秋枕夢

冷然一夜度齊安

寄黃州鄒使君迪光兼簡周弘禴選部

黃州黃菊遍地黃太守飡英齒頰香若少醇醪助秋興
祇應懸榻待周郎

其二

蒼頭信去頻丁囑赤鼻磯頭賦在無聞說使君開碣石
不妨千載配雙珠

黃州周二選部居憂作此寄之君故以星變言事

忤貴人見謫

七月十五憶黃州中有豪賢重姓周任使綸巾為布帽
也能雄辨壓曹劉

其二

占星䟽草勝君房匡鼎揶揄石顯忙今日中天蒙氣盡
可能無意向明光

洞庭陸生醫而能詩以三律見投聊成二絕答之
角頭深處不知年忽破霜風入郡廛買藥收書知已了

祇應還趁太湖船

其二

壞色方袍墊角巾老夫身是佛家身勞君苦贈千秋句
那有虛名可借人

謝雲仙老人皆用古語起

我所思兮在桂林感君屢致瑤華音縱令一語不相薦
終是悠悠千古心

其二

湘中老人讀黃老手搢金光玉芝草他年謁帝何所徵
一點蒼梧紫烟小

題雙雀梅花扇

東厨殘食競饑鴉西舍飽蜂喧晚衙豈是中庭無滯穗
皎然雙雀坐梅花

寒夜懷元馭

無病無愁擁一氈怯寒猶自不成眠誰憐雞骨支牀者
布帽衝風訪墓田

陸少宰與繩北上迂道見訪山中贈別

柴門寂寂掩蒼苔
小雨輕風香篆回
鳥雀慣將籃筍狎
無人知道宰官來

其二

女牛驚見一星高
煖眼初迴仲蔚蒿
中散縱然饒懶癖
可應容易絕山濤

其三

東風不作薜蘿春
物色勞君到隱淪
聖代夔龍方接席

可能容得棄瓢人

其四

濁酒離亭望眼孤
明朝春色傍雛鵲
燕中啼鳥知無數

莫遣空林聞鷓鴣

次日
立春

戲贈于皂先

七月十五夜何其
正值扁舟訪我時
留卿且試盂蘭供
來歲依稀叢桂枝

庭有小方池
延袤不盈丈
種白蓮花且植五垂柳

環之

雪白蓮花出水開
陶家仙令好徘徊
縱令無酒攢眉去
且為薰風五柳來

意上人一棹覽婆羅門
棄家入道通習三乘
援蘇學士贈鄉僧文老
例乞余一言走筆應之

看君竿木向隨身
知是三乘老斲輪
仗作忠師無縫塔
須彌一半萬由旬

其二

當日蜀僧過蜀客於今吳客詠吳僧如何尚有鄉心在
兩兩長松挂葛藤

看李張二子奕

疎簾落日小楸枰
美作山人坐隱名
一片殺機相對發
不如青海去談兵

十二絕句送敬美弟閩中學政

一傲除書兩挂冠
歸雲欲出洞門寒
凝空易作千原雨
承日還高五色翰

其二

莫言時雨未平勻西灑秦天東入閩惟是錢塘一水地

至今猶有望霓人

中推浙學不赴

其三

七閩文物有容輝吹律鄒生事已非欲向春風問消息

一時翹首問烏衣

其四

千疊名山千疊青五更風鐸五更星莫言池草今無夢

也要隨君到慢亭

其五

慢亭溪畔密藏雲
曲曲清流皺縠紋
文火棗嚮來須已啖
前身可是武夷君

其六

倚憶看雲度武夷
霜皮古栢隱叢祠
諸生定有椒漿供

為讀羊公墮淚碑

先君遺愛祠

其七

千林霞碎荔枝風火齊堆盤萬顆同盧橘楊梅知不論
可能收得狀元紅

其八

萬安橋畔水曾波紫螭紅瑤處處多採得明珠堪把翫
莫教魚目笑蹉跎

其九

絳帷斜捲木蘭舟夾岸蠻音入棹謳使者解書丁有尾
不妨行部下汀州

其十

澹圃西連恬憺宮
香煤欲冷樹號風
從他猿鶴相驚怨
自是冰心出處同

其十一

破寒三盞甕頭春
臨到分離亦愴神
我厭長生君用世
可能終作耦耕人

其十二

右丞雖則戀清幽
五短元應讓蜀州
記取玉琴書內句

莫容堂印挂心頭

送肖甫司馬於清洋江口

清尊紅燭暫為歡
臨到分携醉醒難
縱有冰壺心一片
伴君終是怯長安

再送伯玉至清洋口

君携胡建我曹丘
各擁雙株玉樹秋
兩地客星分不得

清洋中半是鴻溝
君舟有胡元瑞及淹嘉二仲
我舟有曹子念及瞻敬二美

三送與繩至齋子

兩岸朱衣送宰官中流衲子話團圓自憐不了能仁字
歸卧杉龕蘿月寒

四送明卿夜宿玉龍橋

玉龍橋下水縱橫疊鼓迴颿斷續聲城頭一片崑山月

多少人疑子晉笙

時月卿携
歌吹弄之

五送本寧觀潮南浦

平原十日未從容流水千重意萬重欲對鄉人誇共載

仙舟自有郭林宗

時貞吉在
本寧舟中

六送楨伯於城西關

母輕畫省老馮郎帶鉦生花艾綬黃記取他年一奇事

嶺南還策漢賢良

馮唐九十復以賢良召

用前例送家弟敬美視閩中學然至北水關而止

蓋余已徙居鄉故也

眼枯無淚意茫然謝傳憑何遣暮年若使彈成白翎雀
便應生斷琵琶絃

鄉進士鄒道甫以嚴君之命借聽於余余實無得

也不忍逆其意以二絕酬之

子雲有字何須問摩詰無言轉更難請看佛堂方丈地
叢叢忍草蔓欄干

又

髻裏明珠當自知無端貧里叩貧兒北山山下千堆土
葬盡神仙不解悲

黎丘大王以手書及詩畫見投寄謝并贈得六絕句
由來龍種盡權奇七步陳王已喚遲今日西園多應教

可能偏少仲宣詩

其二

修竹梁園興有餘墨華長染馬卿裾怪來徧被千金賜
習得家王鳳尾書

其三

讓帝虬髯三葉孫汝陽眉宇尚天人宮花不落研光帽
羯鼓能催萬樹春

其四

芙蓉疊疊冠霓旌千乘賢王春豫情道是麻姑山色好
便呼麟脯寄方平

其五

驚溪百尺繭絲寬手寫淇園萬玉寒移贈王生懸四壁
誰能觸目不琅玕

其六

慚愧何郎通隱名長齋禮佛誦無生縱然博得諸王餉
不乞嵇家舊酒鎗

贈賢者馬道人

誰似燕中馬自然藥囊簑笠但隨肩
生憎董奉多牽繫
不愛人間賣杏錢

送元馭閣老二十里橋同前例得一絕句

一葉輕舠破綠蘋
驚看蓬底兩綸巾
道人却有分攜淚
丞相何無祇候人

弇園雜詠

梵王橋

隱隱紅橋拂地開徐徐蟾魄染青苔諸天幻出金銀相
色界天王盡下來

小祇林

佛日初開大地陰虛疑長者買祇林翛然一片浮雲過
欲問黃金何處尋

藏金閣

會得參同兩漸和莊生昨夜訪維摩若教更會真空意
萬卷函經一字多

小罨畫溪

輕篙刺水澹忘歸
狼籍殘紅處處飛
猶讓當年雪中棹
兩山空翠撲人衣

磬折溝

灣環輕泚似金溝
宛轉洄沿客自留
兩岸芙蓉相對發
即令無酒不悲秋

金粟嶺

罷繡經卷旋呼杯
為愛天香桂子開
醉後飛花滿巾幘

真成金粟卧如来

省獲亭

新醪甕底嘈嘈鳴西鄰稻壠黃雲平老夫眼飽腹亦飽
田家酒家虛得名

縹緲樓

獨立縹緲之飛樓又看浮雲天際頭洞庭西峰九千尺
尺鷃不礙逍遙游

大觀臺

日脚低垂霧半籠
虞山一抹有無中
劃然長嘯天風起
掃盡浮雲現碧空

超然臺

巉巖百尺頰澄潭
天水相和共蔚藍
小坐自然塵外境
日斜無意下西舂

潛虬洞傍水竇

小小空明遠似無
泠然一水自縈紆
潛虬相喚不肯出
為惜胡髯徑寸珠

綰奇臺

小臺猶綰雙奔奇試問臺奇臺不知遊人到此意忽忽
半學楊朱悲路岐

月波橋

兩奔中斷有橋過水東微風也自波最好姮娥輝玉臂
莫容游櫂攪青螺

古廉石

戍削風稜無媚姿主人瞻拜具冠衣乍可鬱林將壓載

那容漢女作支機

壺公樓

壺公飲酒酒初乾誰道壺中天地寬
幻出樓臺成五色飛來日月是雙丸

玉玲瓏一名繚虹

壓盡千峰翡翠空佳名誰並玉玲瓏
梵音閣下眠三日要看繚天吐白虹

青玉筍即錦川峰之佳者並蜀錦也

百尺排空玉筍青山人端不負山靈誰分望帝陵前錦
自是當年役五丁

散花峽

長年鼓棹穿岩壑恰值春闌藤花落一花墮幘酒一杯
懊惱東風不作惡

蟹螯峰

畢郎左手偶一失遺螯千秋化為石當空怕遣酒星知
撮向微垣佐瓊液

流杯石

雲根障底暗泉流
蓮花瓣中蓮葉舟
直疑分出君山酒
奪得頭杯不肯休

飛練峽

游女擎舟向峽邊
驚呼白練界蒼烟
生來未識天台瀑
濕著紅衫不解憐

娛暉灘

灘頭垂楊好繫船
楊枝戲水桃花顛
枕流漱石從他誤

白眼卧看滄浪天

嘉樹亭

嘉樹週遭一水亭不妨呼酒共沈湮
當頭赤日不敢下拂面好風吹自醒

留魚澗

天桃落英長自留游魚一入便堪愁
梁宮亦有千迷道關嶺聞歌九曲流

斂霏亭

倦鳥初棲猶未還一生貪看夕陽山縱令收盡人間色
幾點峰尖紫翠間

小浮玉橋

一拳殘石水中央醉艇縱橫也不妨喚作吳興一浮玉
從教人笑夜郎王

先月亭

呼尊欲緩暮天愁忽有金波潏灩浮摠為西亭最先得
清光一抹露山頭

天鏡潭

纖鱗不起靜無風
倒寫青天入鏡中
兩岸青山帶樓閣
何人不道水晶宮

鳳條館

一片春雲綠正饒
枝枝盡作鳳皇條
他年儻得成焦尾
不待琴心已就挑

寄屠長卿

神虎門頭一挂冠
鏡湖東去海天寬
人間有客都無耳

自是相如勝井丹

其二

莫以憐才少相君提封盡跨五湖雲
請看六字鐫官詔便是仙都十賚文

離資園雜詠

鷓鴣適軒

大鵬九萬苦不足尺鷃搶榆恒有餘
除却逍遙真際在便應方朔羨侏儒

碧浪室

百挺琅玕直復斜
午薰搖入小窗紗
偶然將作清漪看
碧浪湖頭一釣槎

晞髮亭

九月微霜未授衣
桑榆向暖髮堪晞
不知紫翠峰頭斂
愁見棲鴉閃閃歸

壺隱亭小山

數拳培塿小亭前
澗壑峰巒亦宛然
不似壺公暫時幻

主人留結著書緣

詠無住觀中物

白鸚鵡

僊音隱隱似雲和雪色衣裳推素娥生長白蓮花瓣內
那能不遣誦彌陀

雙鶴

青田別種是胎仙午夜清音徹九天我誦黃庭換凡骨
他時一點破蒼烟

馴鴿

日長行散步庭臯插羽佳人媚寂寥五色別成鋪地錦

千鈴忽起半天嬌

插羽佳人半天嬌
皆鴿名見清異錄

朱魚

猩紅數點媚清冷
煖藻香萍度此生
莫向江湖貪廣濶
近來魚網大縱橫

無錫陳生自樊山王郎來將梓其詩乞序姑與飯
而以二絕句止之

詞客淮南氣若雲，莫疑山叟怯相聞。
自然雞黍田家有，只是無名可借君。

其二

平臺新賦許誰賢，惟有相如賜獨偏。
若要上林天子問，吮毫應更十餘年。

題畫壽大叅陽谷先生七十

永嘉城外小緱山，明月長容望鶴閒。
總為陽湖泉石好，

未教王子厭人間。

地有王子巖

其二

千重綠嶂百重流仙籍
垂登朝籍收長見歲星甌
越部不勞明主訪羊裘

送林光宇文學同高吳二茂才還閩四絕句

韓子文章日月光當時閩海一歐陽
不論觀察如常袞分得三珠夜已光

其二

吳江霜冷落楓丹閩嶠繁花正耐看
識字兒曹師友意

春風桃李不成寒

其三

經術從推絳帳師還驚博學與宏詞
諸林樹樹闌天色猶有溫陵桂一枝

其四

高子波瀾自老成吳郎神彩獨縱橫
他年並出延津劍遙見星文動洛城

贈方士賴生

還是江東賴布衣芒屨竹杖歛荆扉于今參得茅家訣
不向青山問所歸

王陽德大參自詫地理師而極口為江右劉生游
揚以為能得景純三昧墓田丙舍一一聽其更
定劉子來謁乃有謂其非真者戲成小絕贈之
王叟青烏誇祕傳逢君却耗買山錢老夫儘有容身地
且傍春風住幾年

其二

青鞋博得杖頭裝笑逐胡姬喚酒嘗
任使桃花開落盡
總然還是舊劉郎

贈莆陽林致遠

曾携銀管侍瑤除
懶向王門曳敝裾
遺恨先朝諸殿榜
如何不遣仲將書

題文太史畫別介徵戶部

淡靄徐分遠近山
孤舟相對白鷗閒
他年倘訪弇州叟
只在漁歌欸乃間

術士孔生種種變幻狡獪見而贈以四絕句

白波沈陸懶登臺一醉逢君笑口開
莫怪書生偏善幻何人不是幻中來

其二

關旗纔罷復藏鉤曼衍魚龍眩未休
却恨茂陵龍去遠不教生拜樂通侯

其三

一念才萌意已通祇緣先墮識情中
老夫心在阿惟越

笑爾逡巡化業蟲

其四

少年場裏索相過不往如呼俗物何一任摩娑雙眼看
山神伎倆苦無多

余生為其父德甫丈乞志墓其別也得四絕句送
之中間且悲且喜或規或嘲往往情見乎辭

七尺穹碑三尺墳五君垂盡到余君却憐身後誰知已
此意淒涼不可聞

其二

阿翁不問生人產有子徒能讀父書不為薛田荒欲盡
可令彈缺嘆無魚

其三

一接余郎月旦評脩然四坐欲風生請看朱邸王孫貴

杜口毘邪學淨名

謂用
晦也

其四

雙眼寧輸郭景純青鞋踏徧為嚴親前山儘有牛眠地

只要余郎自賣身

梁希鴻廣陵人工古文辭貧不能詣吳門今有所
因渡江見訪得二絕贈之

梁生日賦廣陵潮一水吳門天樣遙二十四橋都踏徧
可曾還見伯通橋

其二

揚州白鹽雪滿船揚州白苧白於綿莫將流水輕彈盡
此調那容估客憐

趙凡夫游太學太學師為趙丈汝師其父少叅公
凡夫之王父僉憲公同年也

少年文采宋王孫二水三山繞帝閣携得通家名刺在
不妨長揖叩龍門

其二

橋門霜色凜崢嶸朴教猶存聖世名何事書生紛負笈
幾人千載遇陽城

過西鄰許子看菊時曹子家傍馬

籬邊五色傲霜花
白酒黃雞不用賒
乘興即來酣即去
許家的的勝陶家

其二

千錢不枉買西鄰
濁酒牆頭無限春
曹伯許男容入會
老夫叨長號王人

其三

今年菊種家家少
獨自君籬細葉多
差勝江州王刺史
不須携酒也相過

其四

醉眼摩娑不肯還，任他醺鼓也如閒。
才穿丁卯橋頭過，便是吾家郭裏山。

題慧山泉

一勺清泠下九咽，分明僊掌露珠圓。
空勞陸羽輕題品，天下誰當第一泉。

上人自峨眉來云：欲涉海禮補陀北禮五臺走筆
二絕贈之。

曾棲巴蜀峨眉頂遠見西天鷲嶺無昨夜普賢乘白象
向余先解髻中珠

其二

峨眉十載住不足南禮潮音北五臺巴劫半生何處是
眼前誰箇不如來

余宗漢令君謝全椒事歸作汗漫游者二十載曩
歲以四律寄我方在齋居不能為和今歲復携
七絕句見贈一談而別輒依數報之

五柳柴桑比更青新詩字字敵山靈知君不愛郎官宿
愛向江湖喚客星

其二

美人曾寄紅珊瑚相見仍投明月珠十五秦城償不得
老夫無計且盧胡

其三

七子中原雅唱酬向余何事晚方求但教尋得河源路
天柱崑崙在上頭

其四

天許青山換布衣却防詩社畏金緋屠郎鼓吻徐郎笑
滿載五湖明月歸

其五

愧君虛號謫仙人一點仙源覓未真可為出山呼小草
山中久自有風塵


其六

十八娘紅生荔枝蠔房舌嫩比西施更教何處誇三絕

為有余郎七字詩

其七

一炬叢祠逐楚瞳
令君獨有狄家風
從他憤惋難為報
與說咸陽三月紅



弇州續稿卷二十四